

Regional News Unit AIR Aizawl
Saturday, August 24, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Chief Minister Pu Lalduhoman hriselna leh zirna lama sum sen chu sawrkar chuan expenditure ah a ngai lova investment a ni, a ti.
- Mizoram ah Monkey Pox lo luh ve palh hlauhthawn thila lo inralrin lawk nan Core Committee on M.Pox din a ni.
- Prime Minister Narendra Modia chuan Ukraine leh Russia te chuan tuna an buaina chinfelna kawng an zawn a tul thu a sawi.
- Nepal-a bus chesualah mi 27 aia tlem lo an thi.

<><><>

CM

Chief Minister Pu Lalduhoman hriselna leh zirna lama sum sen chu sawrkar chuan sum senralna- expenditure ah a ngai lova dah punna-investment a ni, a ti.

National Institutional Ranking Framework ten India rama College tha an thlanah Pachhunga University College 35-na a nih lawmna PUC Seminar Hall-a nimina an buatsaih ah he thu hi sawiin Chief Minister chuan, India rama college tha thlan chhuah zinga tel hial khawpa PUC in hma a sawn chu a lawm takzet tih a sawi a, Zirna tha zawk Mizorama a awm theih nana a kaihhruai sawrkarin ruahmanna tlangpui a tarlang a ni.

Thalaiten mahni kea dinga hna an thawh suau suau na ram siam turin skill development uar zel ni se a ti a. Chief Minister chuan Hand Holding Policy an tan dawn hnai tih sawiin, thawhpui tlak thalaite chu tumah thlei bik nei lovin cheng nuai 50 thleng loan awlsam an lak theihna, interest free ni bawk si an chhawp dawn a ni, a ti.

PUC hian Chief Minister hi an college a lo zir tawh a nihna hrerengin thilpek an lo hlan a. Pu Lalduhoma hian 1976 khan PA to CM a nih laiin PUC ah hian Bachelor of Art tha takin a lo pass tawh a ni.

He hunah hian Higher & Technical Education Minister Dr. Vanlalhlana pawhin thusawiin, PUC thawktute zawng zawng chungah lawmthu a sawi a. An zarah NE India-a NIRF top 100 college nei thei awm chhun state an ni a ti.

PUC Principal Prof. H. Lalthanzara chuan hun rei tak an lo beisei tawh PUC ram Land Lease tun hnaia sawrkarin a tihfelsak avangin lawmthu a sawi a, PUC dinhmun leh chanchin tlangpui a sawi bawk. PUC ah hian Arts, Science, Commerce leh Management stream zirna te awmin Under Graduate, Post Graduate leh Ph.D zirlai 2700 chuang an awm mek a, Pachhunga University College hi kum thum chhung a zawnin NIRF top 50 a an lanna a ni.

<><><>

INDEPENDENCE MUSIC FESTIVAL

Akashvani Aizawl leh Govt Mizoram Law College tangkawp chuan Govt Mizoram Law College Legal Chamber ah Independence Music Festival nimin khan an buatsaih a,

He hun hi Assembly Speaker Pu Lalbiakzama'n hmanpuiin, hmun dang atanga Mizoram chhunga hmasawna thleng tur chu do lova hnam ziarang leh nunphung humhalh chung siin Mizoram tana remchanga hman thiam a pawimawh a tih thu a sawi a, chim ral hlauh vanga ramchhunga hmasawna lo thleng tur lo do chu thalo atih thu sawiin hnam ziarang leh nunphung humhalh chungin hmasawna chu nunpui thiam a pawimawh a ti a, ram changkanna lo lut te chu thlir dan thiam a pawimawh a ti a ni.

Pu Lalbiakzama chuan Rimawi chu mihring in lawmna a neih lanchhuahtirna langsar ber zing a mi a ni a ti a, Rimawi chu thusawi, infuih tharna leh inpumkhatna hmanrua chak ber a ni tih sawiin Rimawi chuan ramri, nunphung leh kum thliar hrang lo in mitin thirlungah thu a sawi nghal vek thei a ni a ti a, hnam hrang leh ram hrang a cheng te pawh min kuah khawm thei tih sawiin rimawi chuan mi beidawngte a kai tho a, huaisenna leh beiseina thar a pe thin a ti bawk.

Pu Lalbiakzama chuan zai mite chu Mizo nihna ti lang thei hla chawisang zual tur leh Mizo nihna vawng nung reng turin a chah a, zirlaite chu dikna tundin kawnga Mizoram hmalam hun an kutah a awm tih sawiin Dan leh hrai lama kawng zawh thlangtu te chu an hna sumdawna ah ngai lova, rawngbawlina ah ngai zawk turin a chah bawk.

Independence Music Festival-ah hian Akashvani Aizawl Director, Cluster Head ni bawk Pu DR Lalropuia chuan ramchhung State capital zawng zawng a AIR Stations-te, tun August thla chung a Independence Music Festival nei tur a tih an nih angin, he festival hi buatsaih a ni a ti.

He hun hi Govt. Mizoram Law College Principal Dr. Esther L. Chhange chuan a hmanpui bawk aa, Radio program ngaithla thintute hnenah Radio set pekchhuah a ni a, heng bakah hian Ram zalenna pualin quiz competition neih niin Law College zirlai hrang hrang te an tel a, chawhnu lamah Independence Music Festival pualin concert buatsaih niin zaithiam hrang hrang an zai a ni.



MONKEY POX

Khawvel ram hrang hrangah Monkey Pox vei hmuh chhuah an awm nual avang leh he hriin Mizoram a lo luh ve palh hlauhthawn thila lo inralrin lawk nan Core Committee on M.Pox din a ni.

Nimin khan Directorate of Health Services Director's Meeting Room-ah Health Directorate Official te thu khawm chuan Core Committee hi dinin hemi hnuaiah hian committee peng hrang hrang din chhawn leh a ni ang.

He meeting hi Dr. Vanlalsawma, Principal Director in a kaihruai a. IDSP State Nodal Officer Dr. Vanlalrengpua chuan India ramah hian case hmuh la ni chiah lo mah se tunlai khawvelah inkalpawhna a awlsam tawh avangin he hri hian a luh chilh thuai lovang tih a sawi theih loh a ti a ni.

Meeting chuan ZMC chu ICMR lamin Sentinel Site atan a lo puan tawh avangin thum chaka tihchangtlun chhoh zel a ni tih tarlangin hri pui leng a awm palh pawha lo in rinlawk dan tur kawng hi ruahmanna a lo kalpui tawh tih an tarlang a, ZMC bakah hian Lunglei Civil Hospital pawh tlema tih changtlun chuan Sentinel Site atan hman mai theih a nih beisei a ni, an ti.

Nimin vek khan Health Department chuan thu chhuah siamin tunhnaia social media hrang hranga Siaha naupang M.Pox hri vei hmuh chhuah ni awma thu thang chu thu dik lo a nih thu leh naupangin a vei natna hi Tangseh a nih zawk thu a tarlang a.

Naupang pawh hi tunah chuan a dam tawh a ni an ti.

Social media-a thuthang dik lo awm thin chu pawl an tih thu leh hemi kawngah hian thil chiang lo, mipui thin ti thawnga tithlabar thei thil theh darh lo turin mipuite an ngen nghal bawk.

Monkey Pox hi mizo tawnga a hming dah a ni lo a, Zawng hri ti a mizote hriat lar thin 'Small Pox' nen a in ang lo va, ngaih pawlh loh tur a ni tih Health Dept thuchhuah chuan a tarlang bawk.

<><><>

LUNGLEI HEALTHY CAMPAIGN

Healthy Lunglei District Campaign hnuaiiah Lunglei khawpui chhunga kum 30 chung lam mi 23,673 zinga zaa 3.9 endik an ni tawh a. Fur zawh lamah Lunglei khawpui pawn tuam tura hma lak chhunzawm tum a ni.

Nimin khan Lunglei District Bawrsap Pu R. Lalhzazuala hovin a office chamber-ah Healthy Lunglei District Campaign kalpui mek thlir ho niin, hma lak zui zel dan tur sawi ho a ni a.

He hunah hian Additional Deputy Commissioner Pu James Miahlung chuan Healthy Lunglei District Campaign hnuaiiah hma lak tawh china hlawhtlinna chu lawmawm an tih thu sawiin, District chhungah hriselna kawnga hmasawna a thlen zel an beisei thu an sawi a. Huam zau leh hlawhtling zawka hma lak dan tura rawtna leh ruahmanna hrang hrangte an sawi ho nghal a ni.

Healthy Lunglei District Campaign hi Lunglei District-in hriselna lama hma a sawn theih nana ruahman niin, June ni 12 khan Health Minister Pi Lalrinpui'n a hawng a. He campaign hnuaiiah hian Lunglei khawpui chhungah natna inkai chhawn theih loh Non-Communicable Disease (NCD) chungchang inzirtirna leh hriselna dinhmun endikna (screening) buatsaih thin niin, kohhran thalai, pawl (association) hrang hrang leh sawrkar office hrang hrang zingah NCD Awareness & Screening tum 16 buatsaih tawh a ni.

Awareness-ah hian mi 1,745 telin, an zinga mi 1,255 -mipa 776 leh hmeichhia 479 chu an hriselna dinhmun endik nghal a ni a. He screening atang hian BP sang tih hriat chhuah thar 108 awmin, inhre sa endik nawn 144 an awm bawk.

<><><>

MYANMAR GOODS

Myanmar atanga laklulh thin bungraw chi hrang hrang a rawn kal mumal theih loh avangin Zokhawthar leh a kianga Mizo khua, Khawmawia Puakphurtu leh dawrkai bakah lirthei hmanga eizawngtuten harsatna an tawh mek a.

Zokhawthar VCP Pu Lalmuanpuia hnen atanga thu dawn danin June ni 8a Teddim leh Zokhawthar inkara Run lei Bomb chhiat a nih hnuah Tahan atanga Zokhawthar inkarah sumdawna bungrua leh nitin mamawh thlai leh thildangte sumdawna kawngpui hman lar berah an kal mumal theih loh avangin Tahan atangin Chin Hills a Falam kaltlanga bungrua hi Mizoram lam pana rawn phurh thin a ni a, mahse, he kawngpuiah hian ni 3 lai te kawng laka thang a ngaih avangin bungraw lo thleng ang ang te chu tun hma zawng aiin a man a sang chho vek tawh a,

Tun hma lama Ni khata bungraw thleng thin kha, tunah chuan kar khat velah a thleng thin a ni. Hei hian Bungraw thenkhat panhnah leh tawih mai thei thil a chhiat phah fova, sumdawngteah harsatna a thlen fo thin a ni.

Bungraw phur chi hi Falam lam atanga kal hi PDF in motor lian kal a phalloh hnu phei chuan, Bungrua hi motor te in an thiar a, bungrua a thleng muang hle a, Hei hian Nitina bungraw load/Unload a hnathawk Zokhawthar leh Khawmawi mipuite tan eizawna lamah harsatna a thlen nasa hle a ni.

Zokhawthar Transport Union Secretary hnen atanga thudawn danin Customs ten thlahlui July ni 25 atang khan Mizorama bungraw phurh luh an phallo bawk a, Nitina Zokhawthar atanga bungrua chhuak hi LPK trip hnih ang vel chauh a ni tawh a, hetihlai hian Zokhawthara Mutia mi 400 vel chuan hnathawh tur an hmu mumal ta lo a ni.

Tun dinhmunah chuan Myanmar atanga Bungrua lo thleng a awm mumal loh avangin khualzin an tlem a, Taxi, thingpui dawr leh thil danga eizawngtu pawh nasa takin a nghawng chho mek a, hetihlai hian Myanmar leh India pawisa inthlengna rate chu India pawisa Rs.1 in Myanmar Kyat 67 a thleng theih mek a ni.

<><><>

PM

Prime Minister Narendra Modia chuan Ukraine leh Russia te chuan tuna an buaina chinfelna kawng an zawn a tul thu a sawi. Nimina Ukrainian President Volodymyr Zelensky nen an inkawmnaah he thu hi sawiin Pu Modia chuan remna a awm theih nan theihtawp chhuah a inpeih reng a ni a ti a. India chuan remna siam turin ruahmanna tha leh mipuite awn tlat ruahmanna a nei a ti a. Ramin zalenna leh thuneihna an neih chu a thlawp tlat tih a sawi bawk a ni. Pu Modia chuan tunhnaia Russia a tlawh thu pawh sawilangin indona mualah engmah buaina chinfelna tur a awm lo tih sawiin inbiakna leh dawhkan kilhoa sawi fel theih chi a ni a ti bawk.

Prime Minister Modia leh President Zelensky te hian ram pahnih inkar thil pawimawh tak tak eibar zawna leh sumdawnnate, agriculture, hmasawna ruhrel infrastructure, health leh zirna, damdawisiamna, ralthuam, culture leh mipuite inpawhtlanna tur thilte an sawi dun a. Thawhdunna tur inremna thuthlung pali an ziak a ni.

Tun tuma PM Modia'n Ukraine a tlawh hi India PM zinga tlawh hmasa ber a ni

<><><>

NEPAL

Nepal-a bus chesualah mi 27 aia tlem lo an thi. THudawn danin khual zin phur bus hi nimin chawhnu khan Marsyangdi River ah a tla lut a. Aanbukhaireni Hospital Chief Dr. DB Kshetri chuan mitthi zinga 24 hi passenger an nih thu leh midang 3 hi bus staff an nih thu a sawi.

He bus hi Pokhara atanga Kathmandu pana tlan a ni a. Police te sawidanin bus ah hian India mi 40 vel an chaung ve a. Chhanchhuah hna hi Nepal Army, Nepal Police leh APF team ten an thawk nghal a ni.

<><><>

PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zui ang. Tun tum ami hi episode 113-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestre am a ni ang.

<><><>